

欽定剿平粵匪方略

欽定勦平粵匪方略卷三十一 癸丑年

三月初一日乙巳楊殿邦奏言賊匪於二十二日

蔽江而下臣卽飭令瓜州艇船在江面接仗打
沈賊船無數不料申刻風轉賊船順流而下我
兵衆寡不敵賊勢乘機擁入隨飭瓜口安置之
徐州兵二百名開礮轟擊無如賊數衆多復由
儀徵旱路分道而來水陸並進直抵揚城我兵

力弱不能兼顧揚城隨於二十三日失陷臣折
回高寶一帶擇要守禦沿途察看情形河隄高
出於城地勢城身均皆低窪雖議固守實無把
握因思淮安水利向由牯壩啟閉爲洩蓄現在
各路大兵未到兵力單弱斷難守禦不若啟放
各牯壩洩盡淮水使賊舟滯行不能上竄祇須
在兩岸堵禦較易爲力若賊匪竄至高寶或竟

決洪湖使水下注該匪自當全股淹沒惟水係
河臣專管臣當赴浦密商籌辦一面飭但明倫
駐紮高寶一帶多雇壯勇先行擇要防堵臣亦
卽由浦趕緊南下在淮安一帶招募糧船水手
一千名鄉勇一千名交前任淮安府知府福楸
統帶可資得力並督同該司在高寶堵禦請

旨迅飭各路大兵趕緊前來庶可併力前進臣未能竭

力堵禦以致府城失守應請從重治罪奏入

上命軍機大臣傳諭楊殿邦楊以增曰楊殿邦奏揚州失守請啟放各隔壩洩盡淮水使賊舟滯行不能上竄祇可如此辦理若賊至高寶或竟決洪湖使水下注俾全股淹沒事至危急或可相機應變但恐賊匪未能全股淹沒而吾民又遭昏墊之苦朕心益增憫惻該督等斟酌行之不必拘泥陳金綬所帶之兵在

琦善前路應由何路進援並著知照飛催所募水手鄉勇卽交前任淮安府知府福楙管帶以資堵禦

上又命軍機大臣傳諭琦善陳金綬勝保日前經疊次諭令琦善等嚴防江北杜賊奔竄如果該大臣等迅速進兵相機防剿何至揚州失守現在淮徐一帶在在堪虞著琦善陳金綬勝保卽統帶大兵會同楊殿邦楊以增探明何路緊急卽由何路進攻其黑龍江

吉林馬隊官兵諒已行抵江北著卽飛催進援以遏
賊鋒軍情變幻靡常該大臣等務須相機應變力遏
賊匪北竄之路萬勿再有延誤致干重罪

上又命軍機大臣傳諭李德曰現在賊匪竄入揚郡山
東與江南交界地方必須嚴爲堵禦東省各路營兵
如有可調務卽調赴徐州接壤之處督飭鎮將密爲
防堵沿河兩岸前經疊次諭令該撫設法巡防想已

布置周密仍隨時偵探與楊以增等聲勢聯絡毋令賊匪北竄

上諭內閣曰楊殿邦奏揚州失守自請治罪覽奏憤恨之極逆匪連檣東竄疊次諭令琦善陳金綬督兵前進嚴防江北並分兵兼顧儀徵瓜州一帶該大臣等如果迅速應援猶可扼要堵禦何至賊匪竄入揚郡陳金綬著卽摘去頂戴帶罪圖功琦善前已革去都

統銜此時若加重懲轉得置身事外著該大臣等迅
督大兵前往堵剿如再延誤自問當得何罪楊殿邦
著革職留任仍令會同楊以增極力防守毋得再失
機宜致于重罪

初二日丙午陸應穀奏言賊情緊急請調東三省

兵並蒙古各王兵數萬一由山東取道瓜口一
由河南取道淮徐與向榮等合力圍攻賊匪但

既派蒙古官兵非有威望夙著公忠體國之王
公不足以資統馭伏願

皇上擇賢而使假以便宜俾之統帥諸軍則專權歸一
兵機可以速決奏入

上命軍機大臣傳諭陸應穀曰逆匪攻陷揚州狁狁已
極山東與江蘇毗連最形喫重現已調遣重兵扼要
駐紮至河南與安徽接壤亦應一體嚴防遏賊由滁

州分竄之路所有前次調赴信陽州及南陽等處防
兵著該撫卽酌量調赴豫皖交界地方嚴密堵禦

上又命軍機大臣傳諭舒倫保成凱托明阿恩華英隆
曰前經降旨調西安駐防兵一千名甯夏綏遠城駐
防兵各五百名著該將軍等迅速派員管帶起程馳
赴江南淮揚徐州一帶交慧成調遣又續調之吉林
黑龍江官兵各二千名並著該將軍等卽飭配帶軍

裝器械派委得力營員迅速管帶起程來京毋稍延緩

上諭內閣曰著調山西省官兵三千名陝甘省官兵四千名各派得力將弁管領星速馳往山東江南交界地方交李德調遣以資攻勦

初三日丁未直隸提督陳金綬內閣學士勝保奏

言臣等於二十五日距浦口二十里之護國菴

地方紮營探聞浦口一帶已無浮橋賊船在彼
停泊或數十隻或百餘隻不等並於北岸江邊
刨挖陷坑徧插竹籤以防我兵進戰臣等會商
於二十六日寅刻督飭將弁分隊進兵巳刻馳
抵浦口鎮城內外賊匪紛至我兵分布四面臣
陳金綬督兵圍攻賊衆撲出南關迎拒我兵奮
力擊殺臣勝保督兵繼之忽聞南岸賊營礮聲

不絕江邊帆檣絡繹駛泊北岸急令將弁繞出
賊前截擊並分兵由東關衝入追殺該逆勢不
能支紛紛逃竄奔赴江岸擁上賊船盡行開赴
下游一帶共計斬獲黃巾賊匪首級二十餘顆
生擒十餘名鎮城業已收復惟該逆未受大創
臣等又不克覓船渡江曷勝焦憤現聞賊船分
赴下游揚州鎮江俱極喫緊又恐南岸賊匪併

續資治通鑑長編卷三十一
七
力復來更不能不加意防範應候琦善到浦駐
守臣等卽當移兵直赴下游北岸一帶擇要防
勦儻能渡江進攻隨時相機辦理斷不敢稍事
遷延奏入

上命軍機大臣傳諭琦善陳金綬勝保曰此次浦口接
仗尙爲得手而逆匪總未大受懲創昨據楊殿邦奏
揚州失守已諭令琦善陳金綬等趕緊進攻著卽統

帶大兵迅赴揚州痛加攻勦使賊匪不敢占踞揚州
庶可杜其北竄之路現在淮徐一帶萬分喫緊專待
陳金綬等帶兵赴援切不可再有遲誤致干重咎

同日呂賢基周天爵奏言據江浦縣知縣曾勉
禮稟報賊匪本不甚多其黨與係沿途裹脅凡
有身家者皆不願從恭請

皇上乘此時民心未失拔之陷溺之中各予以自新之

路

欽頒賞格令統兵大臣等廣爲布告俾脅從之衆或在賊中殺賊以爲內應或將賊中虛實密報大營或於臨陣時倒戈向賊均准赦其從賊之罪賞其殺賊之功並請亟

飭統兵諸臣乘賊守具未備之時四面兜剿賊現於金陵城外築土城插竹籤以爲固守之計若不乘

機速戰誠恐墮其術中

周天爵又奏言徐宿一帶人心甫定撫綏彈壓一切均須布置工部左侍郎呂賢基暫駐宿州以資坐鎮臣拜摺後卽馳赴廬鳳一帶抄勦南路土匪再折回泗州盱眙由洪澤湖上下巡拏奸匪直抵清江督辦防務其山東與安徽江南毗連各處當隨時知照山東撫臣李德一體嚴

防臣巡行周徧卽回宿州一帶扼要駐紮彼時
呂賢基再親赴各屬巡查團練事宜再徐州爲
黃河上下千有餘里居中要隘臣料髮逆旣踞
江甯儻欲北竄必經清江滌州東西兩路而以
徐州爲控制喫重之地署總兵聶金鏞守護糧
臺是其專責且營中弁兵奉調將盡該員更難
遠離相應請

旨將聶金鏞暫留徐州庶於禦賊守餉兩有神益奏入
上命軍機大臣傳諭呂賢基周天爵揚殿邦楊以增李
德李嘉端曰前曾疊降諭旨令統兵大員解散脅從
懸賞殺賊此時逆匪攻陷揚州事勢緊急更應防其
迫脅良民勾結滋擾卽著該督撫等剴切宣諭設法
招徠妥爲辦理徐州爲居中扼要之地設立糧臺總
兵聶金鏞著卽留於該處於禦賊守餉兩有神益其

南路各股土匪現在周天爵親赴廬鳳一帶抄勦務
卽督飭各州縣趕緊搜捕毋令竄過滁州與揚州儀
徵一帶賊匪聯爲一氣其與山東河南毗連各處著
楊殿邦楊以增李德一體嚴防以期聲勢聯絡呂賢
基卽暫駐宿州以資坐鎮俟周天爵回宿後再赴各
屬巡察團練事宜仍先與各紳耆籌商妥辦

初四日

戊申

琦善陳金綬勝保奏言浦口收復後

臣琦善卽於次日辰刻親督弁兵馳抵浦口江岸察看見江北有賊船二十餘隻停泊沿江葦垛林立。在後賊船多隻均爲葦垛遮蔽。臣陳金綬等正在江岸整隊彼此晤商以賊人隱匿舟中難於攻擊必須誘其上岸方可乘機勦除。臣陳金綬卽帶弁兵由浦口東山外越赴江邊出其不意拋擲火彈將停泊賊船二十餘隻焚燒。

船賊驚起正思抵敵火已延發該逆紛紛墜水
人船同時俱盡復督率弁兵馳赴西邊江岸將
葦塚數處亦用計燒燬臣勝保帶兵接應而江
心及南岸停泊賊船但放大礮並無船隻前來
撲救亦無賊匪上岸迎拒我兵多方引誘不出
江面又寬火箭遠不能及祇得收隊伏思賊匪
恃舟爲藏身之固此時京兵已抵北岸大江遙

隔無船可渡若徒事堵守轉中該匪牽掣之計
現在會商 臣陳金綬 臣勝保卽於二十九日先
行帶兵馳赴六合儀徵一帶追剿 臣琦善飛催
吉林黑龍江弁兵趕緊前來酌量派撥留守後
亦卽馳赴下游以爲接應至前調之山東西安
兵探無確耗由豫改道之黑龍江官兵祇有第
三起德興阿趕到其西陵阿明慶管帶之兵與

皇朝通志卷三十一
吉林官兵均尙未到惟有趕緊迎提一面相機
勦辦

琦善又奏言聞該逆將船中輜重搬運江甯省
城其船隻不肯輕棄每於上下游肆意游蕩現
在揚州被擾鎮江文報不通蘇松一帶處處可
危卽竭力堵禦該逆不能竄擾下游而上游未
被蹂躪之區難保不肆行紛竄四川爲腴潤之

鄉一江直達防範尤未可稍疏近來各省皆以
守城爲重待其兵臨城下始與抵禦爲時已晚
惟有於沿江各處覓備船廠先於江心迎截衝
擊一面固守城垣搜斬奸細庶不致處處落後
以冀賊可鏟除奏入

上命軍機大臣傳諭琦善陳金綬勝保曰揚州失守淮
徐一帶萬分喫緊該大臣等統兵嚴防江北是其專

責現在江浦雖經收復揚州仍被占踞淮徐兵力甚單急盼大兵進攻遏其北竄陳金綬勝保旣先行追剿著琦善一面飛催未到官兵一面督率將弁前往接應務將揚州收復無令賊匪紛竄淮徐切不可
官兵尙未到齊藉詞再有延誤

上又命軍機大臣傳諭陸應穀曰大兵已至江南所有河南信陽糧臺應改由歸德取道徐州徑赴天長六

合較爲近便著陸應穀體察情形應如何籌畫盡善以期無誤軍需卽行知照琦善等總期源源接濟不致梗阻遲延

上又命軍機大臣傳諭張亮基駱秉章曰現在賊匪攻陷江甯揚州疊飭各路大兵會剿難保該逆被創後不沿江回竄湖北武漢黃各郡雖經收復各要隘防堵仍不可鬆懈據琦善奏該逆不肯輕棄船隻現在

江面肆意游蕩著該署督撫察看沿江地方如道士
泐黃石港等險要處所必須設法防守當此無事之
時正可安排船礮以備不虞並可爲下游調撥攻剿
之用仍須搜捕奸細毋令潛伏勾結

初五日

己酉

刑部侍郎奕經奏言竊查逆匪鷓張

蹂躪數省現在江北戒嚴臣曾歷其地揣其形
勢並無險要可守東南地勢河汊紛歧我兵行

走遲緩致賊得以長驅肆擾所有黃河南北及
附京各海口山東直隸河南奉天等處籌備似
宜周密請

旨飭下近京各督撫將軍相度機宜派委幹練員弁扼
要駐守並嚴飭該管府廳州縣商同在籍紳士
各分地面團練防備務期聲勢聯絡互相策應
又查黃河南北口岸極多其過渡船隻亦宜防

其劫奪至洪澤湖距黃河最近一帶卽從前放
清刷黃之所儻逆匪暗掘隄壩則河湖相連勢
若建瓴不特大江船隻可以溯流渡黃而下游
一帶各隄岸實有衝決之患思患豫防尤當早
爲之計請

旨飭下河督及地方各官早爲籌備以防詭謀其由清
江浦以南一路宜多設偵探如有警報迅將黃

河各口岸官渡及商販各船調泊北岸杜賊北
竄之路又長江出海之口爲圖山關其口外海
面迤南爲崇明上海迤北轉東折西而行南爲
山東登萊海岸北卽奉天之金州旅順蓋平牛
莊諸口再西則直達天津海口每年春夏之交
閩廣江浙山東直隸各商船載貨販糧咸集奉
天各口岸誠恐逆匪假扮商賈乘此南風正盛

之時由海駛至天津勾結土匪爲肘腋之患又
思賊匪旣謀入海自必覓用商船恐海岸遼闊
偵探不確則良莠難分是須責成江南浙江出
海各口及山東登萊等處文武各官設法密探
彼此知會庶免貽誤奏入

上命軍機大臣傳諭奕興曰逆匪竄踞金陵復陷揚州
若被追勦入海則奉天亦應豫防著奕興及各該副

都統將水陸各兵揀挑精銳認真操演以備不虞升
任副都統瑞昌於金州情形熟悉著卽酌量情形若
瑞昌尙得力卽奏明緩赴新任並著持以鎮靜不動
聲色密查奸細毋任勾串滋擾

上又命軍機大臣傳諭訥爾經額曰逆匪竄至揚州當
經諭令山東巡撫李德添兵防剿直隸界連東省陸
路扼要處所該督當已密爲防範天津水陸交通亦

須不動聲色嚴密布置並著飭令該管鎮道隨時查緝奸細毋任溷跡

上又命軍機大臣傳諭李德曰現在賊踞揚州山東地方更形喫重該撫務當嚴飭地方各官及沿河文武實力巡查無任奸宄溜入山東官兵調往他省者已數千名前有旨添派山西兵三千名陝甘兵四千名交李德調遣但恐一時未能趕到該撫卽先將本省

之兵移遠就近以備防守登萊等處海口爲商船由
海赴天津必由之路難保逆匪不假扮商賈駛至天
津勾結土匪亦不可不豫爲之防著該撫卽飭令沿
海文武各官密爲偵探如有逆匪假冒商船北駛卽
一面奏聞一面飛咨直隸總督妥爲防範

初六日
庚戌

上命軍機大臣傳諭琦善陳金綬勝保曰淮徐一帶界

連山東該處兵力單弱現雖添調山西陝甘各兵迅
赴山東江南交界而到齊尙需時日朕心實爲焦急
該大臣等統帶大兵進剿揚州股匪務當一面圍攻
剋期收復仍一面分兵繞至淮徐等處扼要堵截遏
賊北竄之路逆匪詭詐多端往往爲聲東擊西之計
我兵總須繞出賊前出奇制勝斷不可徒事尾追致
賊深入是爲至要

上又命軍機大臣傳諭李德曰現在山東與江南接壤地方情形十分緊要所謂山陝官兵一時未能卽到所有黑龍江馬隊官兵由山東境內行走著李德斟酌情形如須留於山東江南交界扼要處所卽知照琦善陳金綬勝保等酌量布置現當賊勢猖獗地方喫緊該撫務宜妥速籌防與楊殿邦楊以增合力辦理萬不可令逆匪北竄

上又命軍機大臣傳諭訥爾經額曰現在賊勢狡猾誠恐乘機北竄直隸與山東河南接壤地方急應嚴密防堵著卽飭令新任藩司張集馨擇要駐紮督飭地方文武員弁實力巡查毋任奸宄溷入本省官兵著該督酌量調撥移遠就近以備防守

初七日 辛亥 楊以增奏言揚州已於二月二十三

日失守賊氛逼近清江非得大兵屯紮難期堵

禦現浦上存兵不過三百名新募練勇不過一
千餘名即使續有新募亦恐難期得力臣前請
調狼山鎮標暨鹽城掘港等營兵丁恐揚城旣
失通州一帶亦資防堵未必能兼顧清江臣探
聞琦善十九日已抵合肥向榮二十日抵丹徒
陳金綬二十二日抵全椒均距清江不遠應請
旨飭下該大臣等星速分兵來浦會堵以資周密奏入

上命軍機大臣傳諭楊以增楊殿邦曰淮河以下水勢湍急賊船斷難上駛其由陸路分竄者似非大股陳金綬所帶之兵足敷抵禦楊殿邦前奏自浦回淮後招募水手鄉勇亦可以助兵力著卽會同擇要堵剿萬不可使其踰淮而北黃河襟帶雖云天險防守總恃人力若一經竄至清江愈難著力該督等總須加意慎重勿致疏虞

上又命軍機大臣傳諭琦善陳金綬勝保曰賊竄揚郡
淮安清江勢甚危急陳金綬勝保必須設法繞出賊
前迅速援應方不致有疏虞賊蹤靡定軍務情形日
夕不同一切布置朕既不爲遙制琦善等統領重兵
若不能爲民除害任賊北竄自問當得何罪

初八日

壬子

上命軍機大臣傳諭向榮許乃釗曰近聞鎮江又復失

陷因思江甯孝陵衛壞接句容爲內通蘇常要道該
逆旣陷鎮江難保其不由丹陽直趨常州則蘇杭各
郡勢在危迫楊文定久無報到現在何處鎮江係何
日失事城中文武官員是否先已遷徙該大臣相距
較近當已探悉賊匪攻陷揚州其分擾江南江北是
否意在北竄抑欲牽掣北軍專擾蘇杭其大隊首逆
尙在江甯與否向榮營中兵勇一萬七千餘名帶兵

提鎮將弁均係久歷戎行若能相機攻剿不但南岸賊匪不敢窺伺蘇常卽現竄北岸揚州一帶之賊亦易剿除許乃釗現署巡撫更當設法保衛蘇州省垣所有先經雇覓之上海夾板船及廣艇等船廠計已早到江面向榮所帶上游湖南船廠亦當駛到若水陸夾攻可期得力現在揚州已有賊匪已飭陳金綬勝保扼守江北徑赴揚州琦善相機策應向榮與許

乃釗卽熟商江南如何兜勦不令更致蔓延並可一面知照江忠源迅帶兵練接應怡良到江南尙需時日所謂福建官兵著向榮許乃釗飛催前來爲蘇常應援並嚴飭地方文武隨時密拏奸細以防內應仍將現辦情形迅速具奏

上又命軍機大臣傳諭琦善陳金綬勝保曰揚州失守淮徐戒嚴疊經諭令該大臣等相機應援陳金綬勝

保自以急勦揚州之賊爲要其所帶官兵有六千七百餘名亦不爲單弱其未到各路官兵旣經琦善加緊催提當可陸續趕到陳金綬勝保旣抵揚州後著卽剋期克復會同楊殿邦楊以增等扼要防勦琦善仍遵前旨隨時策應該逆聲東擊西避實搆虛是其慣技或由陸路抄襲或由水路窺擾應如何防堵截擊軍情變遷靡定在該大臣等熟籌緩急遏賊北窺

不致貽誤事機方爲盡善

上又命軍機大臣傳諭陸應穀曰現在賊陷揚州琦善駐紮浦口江北防剿萬分喫緊若令官兵行糧匱乏鉛藥馬匹等項亦不應手則雖有勁旅亦難展施著陸應穀竭力籌畫將糧臺現擬改設何所以期妥便之處迅速具奏並將現到大營之馬隊官兵應需鍋帳鉛藥馬匹速飭糧臺先行趕運未到後起各兵一

體嚴催應付萬不可再有遲誤

上諭內閣曰湖北按察使江忠源著帶領親信兵練馳
赴江南向榮軍營幫辦軍務

上又諭內閣曰楊文定現署兩江總督所有江蘇巡撫
印務著許乃釗暫行署理仍幫辦軍務

初九日 癸丑 署兩江總督江蘇巡撫楊文定奏言

前因江甯失守曾經奏明陸路由副都統文藝

統兵扼要設防臣由水路親督艇師各船防守
瓜口乃旗營各弁兵竟未在山嘴頭地方紮營
二月二十一日探聞賊船東下已過儀徵是晚
適漕臣咨令蘇松鎮總兵葉常春到鎮統帶水
師次日辰刻遙見賊船百餘隻艇船卽迎上開
礮擊破賊船十餘隻並斃匪數十人賊遂敗逃
艇船追至黃天蕩賊匪多棄船登洲後復來大

股賊船三四百隻艇船順流退至金山下屯紮
斯時若陸路有兵助戰尙可有爲乃臣遣人登
山瞭望並不見岸上有一人一騎爲水師助勢
賊雖不敢漫船而過已分股由鮎魚套登陸至
金山放火艇船驚恐亦卽退過焦山賊復至北
固山放火直入鎮江府城城內守兵暨副都統
早已不知所在遂爲賊踞二十三日葉常春恐

賊船繞襲其後並未知照到臣卽自坐艇船下行各船隨之復退二十餘里臣恐去賊過遠無從牽制賊匪使不得逞次日復將艇船紮近焦山口門臣當此欲進不能欲退不可之際惟有移紮江陰靖江江面探明南北道途權通文報仰懇

皇上嚴催統兵各大臣剋期前來臣統帶各師船繼進

水陸交攻庶可使江路開通各城克復奏入

上命軍機大臣傳諭向榮楊文定許乃釗曰瓜州鎮江
爲南北水路咽喉屢次諭令該署督等豫爲籌防嚴
密堵禦乃賊匪乘船東下葉常春統帶水師楊文定
督飭艇船迎剿忽因風信全無艇船退下以致賊匪
登陸直入鎮江而旗營弁兵又未在山嘴頭地方紮
營毫無準備一至於此楊文定已退至江陰並非要

路又退敗之餘更無把握向榮駐兵江南所有南岸
堵剿事宜是其專責該大臣現任孝陵衛原以防賊
南竄之路今鎮江亦失可由丹陽直達蘇常著向榮
斟酌情形如能撥將弁帶兵扼要攻守或克復鎮江
使賊不得進擾蘇常則向榮一軍庶不致腹背受敵
該大臣總當統籌全局勿爲浮言所惑楊文定亦當
收集殘兵據守要路所調上海船隻諒已早到著與

向榮陸路之兵合力夾擊以贖前愆江蘇省垣防守事宜著許乃釗悉心籌畫毋誤事機

上諭內閣曰賊船越過瓜口直入鎮江該府爲南北咽喉

朕早料賊必窺伺屢次諭令楊文定等嚴密籌防如果布置得宜何至遽行失守楊文定督率無方總兵葉常春督戰不力均著革職暫行留任以觀後效

同日陳金綬勝保奏言臣等自收復浦口後卽

與琦善籌商先由六合一帶渡江與向榮合力
夾攻琦善馳紮浦口隨後接應臣等卽日由陸
路帶兵東下行抵六合縣地方據報逆賊分股
竄擾揚州儀徵等縣文報不通郡城已經失守
並傳聞該逆僞南王僞西王等率賊衆萬餘盤
踞郡城四出滋擾查揚州素稱財富爲北岸重
地且自該郡而東爲邵伯高郵寶應等處均係

糧食聚會之區再東爲清江浦湖河襟帶地接
山東係北上大道此正北路最爲喫緊之時臣
等惟有激勵將士設法進剿並飛調馬隊前來
接應以期挫賊兇鋒現聞大路俱有賊探窺我
消息已帶兵由六合縣屬之樊家集陳家集小
路間道馳赴揚州出其不意如能及早克復卽
當迅由瓜州南渡進逼金陵會合夾擊趕緊掃

蕩妖氛斷不敢稍有拘泥致誤事機奏入

上命軍機大臣傳諭琦善陳金綬勝保曰賊竄揚州盤踞郡城四出滋擾儀徵等縣文報不通陳金綬等由六合縣屬之樊家集陳家集小路馳赴揚州以圖克復揚州爲北路咽喉自應先其所急若能迅掃逆燄收復揚郡以後何處緊急卽由何路進兵斷不可稍有拘泥軍情變幻無定旬日以前江北江南原應兼

顧辰下則北方爲不可緩之勢設或逆匪進撲淮安該處兵力甚單惟盼陳金綬等勁旅救援所謂馬隊兵丁前來接應必可得力文報儘有梗塞著卽改道馳遞毋致遲延

上諭內閣曰著盛京將軍迅挑精兵八千名派委得力將弁配齊軍火器械星速來京聽候諭旨調赴東南各路攻剿前有旨令察哈爾都統豫備馬隊官兵四

千名著該都統遵照前數調赴張家口屯住以備調
用至前次所調山西官兵三千名陝甘官兵四千名
吉林黑龍江密雲各路勁兵計已分投起程並著該
將軍督撫副都統等飛飭帶兵各員沿途迅速趨行
毋稍遲誤

初十日

甲寅

向榮奏言逆匪竄踞金陵於土城一

帶紮營堵我進兵之路臣當將各營兵勇分作

十隊於二十六日五鼓分路直攻賊營開放槍
礮該逆不敢拒敵紛紛棄營遁去立將土城一
帶奪回就地趕築營壘分紮要隘適鍾山賊營
有賊四五千叢擁而來當令官兵迎頭開放槍
礮交戰時許該逆不敢抵敵全行敗走我兵奮
勇追殺斃賊無數斬取首級十餘顆二十九日
寅刻傳令各營出隊攻打鍾山各賊營兵勇直

偏賊營環攻該逆並不出戰僅於營內用礮環擊我兵力難攻入隨令兵勇佯爲退去誘其離巢該逆見我兵退後果擁出三四千衆分股趕來誘至里許兵勇返身擊殺賊衆亦放槍礮死拒該逆敗而復出出而復敗傷斃不少戰至巳刻仍敢拌死力鬪臣卽指揮兵勇爲兩路分左右翼從嶺腳抄上親自率領一軍從中路直衝

而上連斃數十賊該逆勢不能敵紛紛逃潰現
在我兵已徧至孝陵一帶紮營趕緊設法相機
進剿能將鍾山奪占即可俯敵全城克復金陵
較易得手奏入

上命軍機大臣傳諭向榮許乃釗曰逆匪占踞江甯雖
經我兵連日接仗獲勝仍未大加懲創賊匪現在分
股滋擾揚州及鎮江各處則江甯城內外屯踞之賊

其勢已分正可趁此機會設法進攻若此處進剿得手則揚州鎮江分股之賊自必聞風膽落卽常州蘇州一帶賊匪亦不敢深入現在陳金綬統帶大兵已馳赴揚州遏賊北竄之路楊文定退至江陰鎮江京口與瓜州南北阻隔該大臣若能設法水陸夾擊方可制勝至常州爲蘇浙門戶該大臣已派總兵李瑞等帶兵二千前往著卽隨時飭令嚴密防守毋得稍

有疏虞

同日

上諭內閣曰著調歸化城官兵二千五百名綏遠城官兵五百名熱河官兵一千名該將軍都統等卽派委得力營員配帶軍裝器械星速馳赴山東江南交界地方交慧成酌量調遣毋稍遲誤

上又諭內閣曰現在添調大兵剿辦賊匪所有軍餉要

需必須妥爲經理略秉章著卽馳往徐州總辦糧臺
事務

十二日
丙辰

上諭內閣曰所有前調之密雲駐防官兵現已陸續來
京著派奕經統帶前赴山東會同李德擇要防堵

十三日
丁巳

上諭內閣曰前調綏遠歸化等城駐防官兵著托明阿

統帶前往山東會同李德擇要防堵

十四日

戊午

楊殿邦奏言查漕船係臣專管水手

素稱強悍再四挑選得精壯健銳者一千五百名又招募清淮海安一帶壯勇一千五百名派令前任淮安府福楸管帶又河右營遊擊馮景尼率領徐州兵勇千餘又令添募邳宿壯勇一千餘名共兵勇三千名仍令該遊擊統帶並添

置槍礮器械此次所募壯勇皆係敢死之士臣
復諭以大義明立條規如有殺賊立功者立予
重賞殺賊頭目者逾格保奏臨時逃避者立卽
斬首數日以來臣親自反復開導該兵勇等遂
皆敵愾同仇誓將殺賊立功可期得力正在啟
行閒接到臣陳金綬臣勝保飛咨已統帶大兵
駐紮揚州之甘泉山會同攻勦兵勇聞之膽氣

倍足奏入

上命軍機大臣傳諭陳金綬勝保楊殿邦楊以增曰朕聞現在賊踞邵伯鎮以下之灣頭挑築土城分令各賊赴六舖買糧以爲持久之計其心叵測恐暗遣奸細探聽前途虛實又圖竄突正當乘其布置未定極力攻勦並斷賊接濟嚴防竄路陳金綬勝保已抵揚州之甘泉山其地是否扼要且在賊後路攻擊若賊

北竄楊殿邦等所募壯勇當賊前衝儘不得力則淮安清江勢甚危急稍有疏虞關繫甚鉅陳金綬勝保務須分領官兵設法繞出賊前與楊殿邦等所派兵勇會勦使賊腹背受敵庶可一鼓殲除楊殿邦楊以增所派將弁兵勇亦應嚴飭併力夾攻不得但恃援兵致有延誤至吉林黑龍江馬隊官兵卽可就近調撥以資攻勦總以相機扼賊前途無任北竄爲要

十五日己未李德奏言竊思統帶官兵總須得力

鎮將查現任陝安鎮總兵郝光甲本係東省膠州協副將臣夙知該員才具開展技藝優長以之效力行閒可得指臂之助仰懇

天恩諭令該總兵郝光甲卽統帶前調官兵迅速來東再曹州府桃源同知姚錫華已升廣東惠州府知府甫經交卸該員辦事勤幹熟悉情形請留

營差委可期得力奏入

上從之

十六日庚申向榮奏言臣疊次督兵誘戰該逆總

不接仗臣等再四籌商非以計取不能得手先

密飭各營將備挑出奮勇敢戰兵壯以備暗襲
賊營之用並令暫緩攻勦以懈其心適連日風
雨賊營防備漸疏探得通濟門外賊營稍單先

於初六日夜密傳號令分兵兩路一攻鍾山一
攻中和橋以分其勢使之不能應援別選精兵
從中路直襲通濟門外之營派提督蘇布通阿
等領軍進攻開放槍礮該逆伏營不出李連升
帶勇先繞賊營之後途遇防哨數賊立時砍斃
伏於山麓秦如虎李若珠帶兵勇由前面進攻
楊瑞乾朱占鼈鄭魁士帶兵勇由左山梁進攻

虎嵩林明安泰帶兵由右山梁進攻一齊逼近賊營四面疊進該逆因我兵屢次攻勦俱未到此猝不及防被我兵槍至賊牆拋擲火罐噴筒打入營內寮棚帳房一時俱燃我兵見賊營火勢已大同聲吶喊搶入營中刀砍矛刺殺斃極多立將賊營三座同時攻破其長髮真賊焚燒殆盡聞有逸出者又爲李連升伏兵擒殺城上

之賊見三營已破卽於通濟門內擁出二三千人來救復被官兵直前衝殺該逆勢不能敵不敢戀戰卽時退回通計殺斃賊匪約三百餘人燒斃六七百名斬獻首級一百五十餘顆生擒九十餘名此初七日攻破賊營大獲勝仗之實在情形也現仍籌畫攻復事宜不敢稍懈總須先奪鍾山以據形勝此外各營便易攻襲奏入

上命軍機大臣傳諭向榮許乃釗曰逆匪竄踞金陵堅拒不出向榮與許乃釗等籌商分兵設伏攻勦賊營官兵人人用命生擒殲斃賊匪甚多辦理甚合機宜軍威大振賊膽已寒該大臣卽督率帶兵大員激勵將士設法圍攻務將城外賊營悉數燒燬奪據鍾山乘勝克復省垣該逆被創不支勢必豕突狼奔其東南各路旣經該大臣派兵扼守常州仍宜嚴密布置

不可令該匪乘間南竄所謂上海各兵船計已可抵京口添造船礮共有若干該大臣務須分飭曉勇將弁水陸兩路夾擊先將北固山賊船與雙牖上新河北河口下關等處賊船木筏設計焚燒不得與北岸瓜儀一帶賊匪聯絡即可肅清江面收復鎮江其東壩一路仍不得以該匪無暇顧及稍涉鬆懈著與楊文定許乃釗嚴飭密防惟該逆狡譎異常難保不聲

言將擾蘇常悉索兇徒渡江疾趨邗上乘勢北竄卽
其占踞金陵堅守抗拒未必非有意牽掣我師令該
大臣不及北顧

上諭內閣曰該逆疊陷城池神人共憤經此大加懲創
自不難勢如破竹向榮調度有方深堪嘉尙發去白
玉如意搬指一箇白玉翎管一枝綠玉煙壺一箇著
卽祗領又發去翎管十一枝搬指三十六箇荷包一

百四十四箇火鑷十三箇小刀四十九把著向榮擇其出力之提鎮將弁及兵丁等傳旨分別給賞前奏所稱都司張國樑首先撲至賊牆被礮打斷左手中指此時是否傷痊遊擊朱占鼇乳傍亦被槍傷此次復於左山梁勦匪均屬奮勉出力著一併酌量賞給

上又諭內閣曰現在賊匪分竄揚州陳金綬勝保統兵進剿定可大挫賊鋒迅殄羣醜並著發去翎管十二

枝墩指三十五箇荷包一百四十二箇火鑪十五把
小刀四十九把交琦善陳金綬勝保等祇領如有奮
勇員弁兵丁著卽傳旨隨時酌量賞給以示激勵

同日步軍統領衙門奏言據江甯駐防前鋒校
松柏副前鋒普定步甲吉陞呈訴本年二月初
十日將軍祥厚因賊匪攻陷儀鳳門已至內城
隨飭令八旗滿洲官兵上城護守八旗婦女或

在城上防堵或送飯巡更祥將軍令松柏等趕
赴鎮江向楊撫台並文副都統稟明被賊攻陷
外城情形懇求代奏因賊兵圍困不能出城旋
因賊衆兵少力不能支是日夜間賊匪攻陷內
城祥將軍霍副都統俱被傷陣亡松柏等由牘
口出城所有兵丁婦女或被賊人追殺或投河
身死均各殉難松柏等到鎮江見楊撫台文副

都統面稟祥將軍等陣亡前後情形並懇求歸
入京口當差文副都統未經收留是以來京呈
訴等情查江甯省城被賊攻陷將軍都統陣亡
伊等前赴鎮江稟見巡撫等不肯收留因係滿
洲駐防無處可奔是以來京呈訴奏入

上諭內閣曰步軍統領衙門奏江甯駐防前鋒校松柏
等呈訴省城失守旗營殉難情形覽奏實深憫惻前

據向榮琦善先後探報江甯被賊攻陷駐防官兵竭力巷戰殺賊數千人茲閱該前鋒校等所呈賊匪初陷儀鳳門時該將軍等飭令八旗滿洲官兵悉力護守內城卽婦女亦多登城防堵迨將軍副都統受傷陣亡內城失陷所有官兵婦女等或奮勇捐軀或臨難自決無一偷生大義凜然洵不愧我滿洲世僕如果守城文武勦力同心皆能似此又何至旬日之間

堅城遽破卽著向榮楊文定許乃釗查明將軍副都
統總督提督及省城文武大小各員陣亡殉難情形
迅速奏明候旨加恩優卹來京具呈之前鋒校松柏
副前鋒普定步甲吉陞卽著暫留京營本旗當差以
示體恤

十八日 壬戌 琦善陳金綬勝保奏言 臣等查看揚

城南面近江東面濱河且賊營環列難以繞越

惟西北兩面尙通陸路 臣陳金綬 臣勝保卽於
初九日巳刻移營至帽兒墩 臣琦善亦於是日
移營至雷塘集相距賊營均止數里 臣陳金綬
臣勝保督飭直隸山東各營將弁帶領官兵攻
打城西賊營因河港紛歧橋梁已斷設法渡河
攻擊賊分兩股來迎開礮抗拒我兵奮勇撲殺
斃賊三百餘名賊卽敗竄我兵因不得地勢未

便窮追臣琦善亦於是日巳刻督飭鑾儀使武慶總兵雙來帶領將備官兵出隊由城北賊營攻打賊匪紛紛迎拒排放槍礮我兵向前衝擊偏近土城燒燬賊營三座計殺斃賊匪二千餘名初十日卯刻臣琦善復督官兵勦殺北路賊匪三百餘名生擒十餘名臣陳金綬臣勝保復由西路進攻賊營自卯至酉燒燬賊營二座殺

斃賊匪一千數百名餘衆紛紛逃散統計兩日
斬獲賊匪幾及四千連用火箭燒燬賊營五座
夜間探悉逆賊潛出附近賊營各村擄人並據
儀徵縣稟報初十十一等日有賊船四五百隻
自江甯連檣東下停泊瓜州一帶顯係該逆前
往江甯搬取救兵臣等現擬合攻一次俾得及
早克復以杜賊北竄之患奏入

上命軍機大臣傳諭琦善陳金綬勝保曰逆匪竄踞揚州極力抗拒經該大臣等分路攻剿兩日斬獲賊匪幾及四千燒燬賊營五座辦理甚合機宜前據向榮奏報連破賊營生擒殲斃甚多兩路大兵勦辦均已得手正可趁此聲威設法圍攻揚州一城不難剋期收復浦口等處現派何員扼守馬隊何處屯紮務須遏賊北竄尤當嚴密偵防萬勿大意該大臣等一面

合力進攻揚州股匪仍一面與向榮等知 水陸並
進南北夾擊俾賊彼此不能相顧楊秀青既據探詢
現在揚州城內尤當設法用計誘擒如能將逆首擒
獲則餘衆聞風潰散勦辦更易得手前據楊殿邦奏
督帶兵勇前赴邵伯鎮一帶攻勦著該大臣等隨時
咨會互爲聲援

上諭內閣曰逆匪竄踞揚州於水陸兩路負險拒守琦

善陳金綬勝保分路進攻連獲大勝統計兩日斬獲賊匪幾及四千連用火箭燒燬賊營五座琦善陳金綬勝保等統帶重兵初次接仗卽能大挫賊鋒深堪嘉尙琦善著賞還都統銜並發去白玉搬指一箇白漢玉煙壺一箇大荷包一對小荷包二箇交琦善祇領陳金綬著賞還頂戴並發去四喜玉搬指一箇白玉翎管一枝大荷包一對交陳金綬祇領又發去四

喜玉搬指一箇大荷包一對小荷包二箇交勝保祇
領前發去賞件並著分賞出力將弁以示鼓勵該大
臣等乘此聲威合力進剿不難剋期收復迅掃妖氛

同日

盛京將軍奕興奏言臣揀選精兵四千名必須大
員統領查新陞杭州將軍瑞昌有膽有識老成
持重臣雖遵

旨斟酌情形暫將該員留於金州然當大兵出征必須
有妥幹大員總統庶可收衆志成城之效臣擬
卽令瑞昌來省統領官兵進京儻蒙

天恩卽令瑞昌統兵出征兵帥一心必能得力至金州
副都統印務卽請

派盛京副都統富呢雅杭阿前往署理以資防範奏入
上從之